

Rumantsch è ina lingua naziunala, ma ina lingua parzialmain uffiziala da la Confederaziun, numnadamain en la correspundenza cun persunas da lingua rumantscha. La translaziun d'in relasch federal serva a l'infurmaziun, n'ha dentant nagina validitad legala.

Ordinaziun davart la furmaziun professiunala (OFPr)

dals 19 da november 2003 (versiun dal 1. da schaner 2015)

Attenziun: Las midadas per ils 1.1.2016 n'èn betg anc integradas.

Il Cussegl federal svizzer,

sa basond sin l'artitgel 65 alinea 1 da la Lescha federala dals 13 da december 2002¹ davart la furmaziun professiunala (LFPr),

ordinescha:

1. chapitel: Disposiziuns generalas

Art. 1 Collavuraziun (art. 1 LFPr)

¹ La collavuraziun da la Confederaziun, dals chantuns e da las organisaziuns dal mund da lavur en la furmaziun professiunala serva a dar a las emprendistas ed als emprendists ina buna qualificaziun ch'è cumparegliabla en tut la Svizra e ch'è orientada al martgà da lavur.

² La Confederaziun collavura per regla cun organisaziuns dal mund da lavur naziunals ch'èn activas en tut la Svizra. Sch'i na dat nagina organisaziun dal mund da lavur en in tschert sector da la furmaziun professiunala, consultescha l'autorità federala:

- a. organisaziuns ch'èn activas en in sector cumparegliabel da la furmaziun professiunala; u
- b. organisaziuns ch'èn activas sin plaun regional en il sector respectiv da la furmaziun professiunala, ed ils chantuns interessads.

Art. 2 Perscrutaziun davart la furmaziun professiunala (art. 4 LFPr)

¹ Il Secretariat da stadi per furmaziun, retschertga ed innovaziun (SEFRI)² promova la perscrutaziun svizra davart la furmaziun professiunala, fin ch'ina infrastruttura

CULF 2003 5047

¹ CS 412.10

duraivla areguard il personal e l'organisaziun ha cuntanschi il nivel scientific che vegn reconusch sin plaun internaziunal.

² Diesch onns sunter l'entrada en vigur da questa ordinaziun examinescha la Confederaziun, sche la perscrutaziun davart la furmaziun professiunala po vegnir integrada en las structuraz naziunales existentas da la promoziun da la perscrutaziun sco in sectur da la perscrutaziun ordinaria da la furmaziun.

³ La perscrutaziun davart la furmaziun professiunala che vegn promovida da la Confederaziun è accordada cun la perscrutaziun da la furmaziun en general e cun il program da la statistica da furmaziun sco er cun l'economia e cun il mund da lavur.

Art. 3 Svilup da la qualitat

(art. 8 LFPr)

¹ Il SEFRI fa ina glista cun las metodos per il svilup da la qualitat en il singuls secturs da la furmaziun professiunala. Questa glista vegn repassada periodicamain.

² Ils purschiders da la furmaziun professiunala pon eleger libramain tranter las metodos da svilup da la qualitat che vegnan menziunadas sin la glista. Ils chantuns pon prescriber ina metoda per ils purschiders da dretg public.

³ Ils standards da qualitat che vegnan fixads dal SEFRI ston cuntentar las pretenziuns actualas e tegnair quint dals basegns da las differentas purschidas.

Art. 4 Resguardar prestaziuns da furmaziun ch'èn gia vegnidas furnidas

(art. 9 al. 2 LFPr)

¹ Per resguardar prestaziuns da furmaziun ch'èn gia vegnidas furnidas, decidan:

- a. l'autorità chantunala, sch'i vegn scursanida individualmain ina furmaziun che fa part d'ina furmaziun fundamentala organisada dal manaschi;
- b. ils purschiders cumpetents, sch'i dat reducziuns individualas d'autras furmaziuns;
- c. ils organs cumpetents, en cas d'admissiun a proceduras da qualificaziun.

² Ils chantuns procuran per posts da consultaziun che gidan las persunas a cumpilar mussaments da qualificaziun per qualificaziuns ch'èn vegnidas acquiridas ordaifer las furmaziuns usitadas, tras experienschas praticas professiunalas u extraprofessiunalas. La cumpilaziun serva sco basa da decisiun per metter a quint las prestaziuns tenor l'alinea 1.

³ Ils posts da contact collavuran cun las organisaziuns dal mund da lavur e consulteschan persunas spezialisadas externas.

² Designaziun da l'unità administrativa tenor l'al. 3 da l'art. 16 da l'Ordinaziun da publicaziun dals 17 da november 2004 (CS 170.512.1), adattada per il 1. da schaner 2013. Questa adattaziun è vegnida fatga en tut il text

Art. 5 Purschiders privats

(art. 11 LFPr)

Cun fixar ina purschida conforma als basegns da scolas professiunalas spezialisadas e da curs intermanaschials resguardan ils chantuns en spezial purschidas privatas ch'èn gratuitas per las emprendistas e per ils emprendists.

2. chapitel: Furmaziun fundamentala professiunala**1. part: Disposiziuns generalas****Art. 6** Noziuns

En execuziun da la LFPr u per la cumplettar signifitga:

- a. furmaziun fundamentala en in manaschi: furmaziun fundamentala che ha lieu principalmain en in manaschi d'emprendissadi u en ina cuminanza da manaschis d'emprendissadi;
- b. furmaziun fundamentala en scola: furmaziun fundamentala che ha lieu principalmain en ina instituziun da scola, particularmain en in lavuratori d'emprendissadi u en ina scola media commerziala;
- c. cuminanza da manaschis d'emprendissadi: concentraziun da plirs manaschis cun l'intent da garantir a las emprendistas ed als emprendists ina furmaziun pratica professiunala generala en differents manaschis spezialisads;
- d. praticum: furmaziun pratica professiunala ch'è integrada en ina furmaziun fundamentala en scola e che vegn absolvida ordaifer la scola.

Art. 7 Preparaziun per la furmaziun fundamentala professiunala

(art. 12 LFPr)

¹ Sco preparaziun per la furmaziun fundamentala professiunala valan purschidas che sa refereschan a la pratica ed al mund da lavur, che suondan il temp da scola obligatoric e che cumpletteschan il program da la scola obligatorica areguard las pretendiuns da la furmaziun fundamentala professiunala.

² Las purschidas da preparaziun per la furmaziun professiunala duran maximalmain in onn e vegnan accordadas temporalmain cun l'onn da scola.

³ Ellas vegnan terminadas cun in giudicament.

Art. 8 Contract d'emprendissadi

(art. 14 ed art. 18 al. 1 LFPr)

¹ Sch'in contract d'emprendissadi tenor l'artitgel 14 alinea 2 segunda frasa LFPr vegn concludi mo per ina part da la furmaziun, ston tut ils contracts per las singulas parts da la furmaziun vegnir sutscricts ed approvads da las autoritads chantunalas fin il cumenzament da l'emprendissadi.

² Sche la furmaziun fundamentala ha lieu en ina cuminanza da manaschis d'emprendissadi, fa il manaschi principal u l'organisaziun principala in contract cun l'emprendista u cun l'emprendist.

³ Il temp d'emproma cumenza cun il cumenzament da la furmaziun fundamentala sut il contract d'emprendissadi correspudent. Sch'i vegn concludì in contract d'emprendissadi tenor l'alinea 1 mo per ina part da la furmaziun, dura il temp d'emproma per questa part per regla 1 mais.

⁴ Las disposiziuns davart il contract d'emprendissadi valan per furmaziuns fundamentalas en in manaschi er, sche talas cumenzan cun ina part da scola pli lunga. L'autorità chantunala po prevair excepziuns, sch'ella garantescha a l'emprendista u a l'emprendist, ch'ella u ch'el po absolver ina furmaziun fundamentala completa sunter la part da scola.

⁵ Il manaschi d'emprendissadi u la cuminanza da manaschis d'emprendissadi inoltescha il contract d'emprendissadi sutscrit a l'autorità chantunala per l'approvaziun avant il cumenzament da la furmaziun fundamentala.

⁶ Las parts contrahentas utiliseschan formulars da contract ch'ils chantuns mettan a disposiziun. Il SEFRI garantescha ch'ils formulars èn unitars en tut la Svizra.

⁷ Sunter avair tadlà las partidas dal contract d'emprendissadi e la scola professiunala spezialisada decida l'autorità chantunala davart las cunvegns contractualas da prolungaziun u da reducziun da la durada da la furmaziun tenor l'artitgel 18 alinea 1 LFPr.

Art. 9 Lieu da la furmaziun fundamentala organisada dal manaschi

(art. 16 al. 2 lit. a LFPr)

¹ Sco lieu d'ina furmaziun fundamentala organisada dal manaschi vala quel lieu, nua ch'i vegn realisada la gronda part da la furmaziun fundamentala organisada dal manaschi.

² Sche la sedia da la firma ed il manaschi d'emprendissadi sa chattan en differents chantuns, vegn considerà sco decisiv il lieu, nua ch'il manaschi d'emprendissadi sa chatta.

³ En cas d'ina cuminanza da manaschis d'emprendissadi è decisiv il lieu, nua ch'il manaschi principal u nua che l'organisaziun principala sa chattan.

⁴ Sche las autoritads chantunalas na pon betg sa cunvegnir davart il lieu da la furmaziun fundamentala organisada dal manaschi, decida il SEFRI.

Art. 10 Pretensiuns spezialas a la furmaziun fundamentala da dus onns

(art. 17 al. 2 ed art. 18 al. 2 LFPr)

¹ La furmaziun fundamentala da dus onns intermediëscha – en cumparegliaziun cun las furmaziuns fundamentalas da trais e da quatter onns – qualificaziuns professiunalas specificas e pli simplas. Ella tegna quint da las premissas individualas da las emprendistas e dals emprendists cun ina purschida d'emprender spezialmain differenziada e cun ina didactica adattada.

² Las ordinaziuns da furmaziun resguardan en la furmaziun fundamentala da dus onns ina midada posteriura en ina furmaziun fundamentala da trais u da quatter onns.

³ La furmaziun fundamentala da dus onns po vegnir reducida u prolungada per maximalmain in onn.

⁴ Sch'il success da la furmaziun d'ina persuna è periclità, decida l'autorità chantunala – suenter avair tadlà l'empredista u l'empredist ed il purschider da la furmaziun – sch'i duai vegnir dà a quella persuna in accumpagnament individual spezialisà.

⁵ L'accumpagnament individual spezialisà na cumpiglia betg mo aspects da scola, mabain tut ils aspects ch'èn relevants per la furmaziun e che fan part da l'ambient da l'empredista u da l'empredist.

Art. 11 Surveglianza
(art. 24 LFPr)

¹ L'autorità chantunala refusa u revochescha la permissiun per la furmaziun, sche la furmaziun pratica professiunala è insufficienta, sche furmaturas e furmaturs professiunals n'adempleschan betg las premissas legalas u violeschan lur obligaziun.

² Sch'il success da la furmaziun fundamentala è mess en dumonda, prenda l'autorità chantunala – suenter avair tadlà las persunas participadas – las mesiras necessarias per intermediar a l'empredista u a l'empredist sche pussaivel ina furmaziun fundamentala che correspunda a sias abilitads ed a sias inclinaziuns.

³ En cas da basegn recumonda l'autorità chantunala a las parts contrahentas d'adaptar il contract d'empredissadi, u gida l'empredista u l'empredist a tshertgar in'otra furmaziun fundamentala professiunala u in auter lieu da furmaziun.

2. part: Ordinaziuns da furmaziun

Art. 12 Cuntegns
(art. 19 LFPr)

¹ Ultra dals objects tenor l'artitgel 19 alinea 2 LFPr reglan las ordinaziuns da la furmaziun fundamentala professiunala:

- a. las cundiziuns d'admissiun;
- b. las furmas d'organisaziun pussaivlas da la furmaziun areguard l'intermediaziun da la materia ed areguard la madrezza persunala ch'è necessaria per exercitar in'actività;
- c. ils instruments per promover la qualità da la furmaziun, sco plans da furmaziun ed auters instruments ch'èn colliads cun quai;
- d. eventualas particularitads regiunalas;
- e. las mesiras per la segirezza da lavur e per la protecziun da la sanadad;

- f. las pretensiuns dal cuntegn e da l'organisaziun a l'intermediaziun da la pratica professiunala en ina instituziun da scola en il senn da l'artitgel 6 litera b;
- g. l'organisaziun, la durada e la materia d'instrucziun dals curs intermanschials e d'auters lieus da furmaziun cumparegliabels sco er lur coordinaziun cun la furmaziun da scola.

^{1bis} Ellas reglan ultra da quai la cumposiziun e las incumbensas da las cumissiuns svizras per il svilup e la qualitat professiunala da las professiuns respectivas. Las cumissiuns ston esser cumponidas en maniera ch'igl è garantì che:

- a. la Confederaziun saja represchentada;
- b. las regiuns linguisticas sajan represchentadas adequatamain.³

^{1ter} Las cumissiuns tenor l'alinea ^{1bis} n'en betg cumissiuns extraparlamentaras en il senn da l'artitgel 57a da la LORA. Ellas vegnan instituidas da las organisaziuns da lavur. Lur commembers vegnan er pajads da questas organisaziuns.⁴

² Per regla sto vegnir previsa l'instrucziun d'ina segunda lingua. Quella duai vegnir reglada tenor ils basegns da la furmaziun fundamentala respectiva.

³ Prescripziuns da furmaziun che divergeschan dals artitgels 47, 48 litera b e 49 da la Lescha da lavur dals 13 da mars 1964⁵, basegnan il consentiment dal secretariat da stadi per l'economia (SECO).

⁴ Las ordinaziuns da furmaziun pon prevair proceduras da promoziun. Talas resguardan la furmaziun a la pratica professiunala e la furmaziun da scola.

⁵ ...⁶

⁶ Las prescripziuns davart la furmaziun da la protecziun cunter radiaziuns che valan per obtegnair las enonuschientschas tenor l'Ordinaziun dals 22 da zercladur 1994⁷ davart la protecziun cunter radiaziuns basegnan il consentiment da l'Uffizi federal da sanadad publica (UFSP).⁸

Art. 13 Dumonda e relasch

(art. 19 al. 1 LFPr)

¹ Las organisaziuns dal mund da lavur en il senn da l'artitgel 1 alinea 2 pon far la dumonda da relaschar in'ordinaziun da furmaziun.

² La dumonda sto vegnir inoltrada, cun ina motivaziun en scrit, al SEFRI.

³ La concepziun e l'entrada en vigur da las ordinaziuns da furmaziun tras il SEFRI premetta la cooperaziun dals chantuns e da las organisaziuns dal mund da lavur.

³ Integrà tras la cifra I 6.3 da l'Ordinaziun dals 9 da november 2011 (examinaziun da las cumissiuns extraparlamentaras), en vigur dapi il 1. da schaner 2012 (CULF 2011 5227)

⁴ Integrà tras la cifra I 6.3 da l'Ordinaziun dals 9 da november 2011 (examinaziun da las cumissiuns extraparlamentaras), en vigur dapi il 1. da schaner 2012 (CULF 2011 5227)
⁵ CS 822.11

⁶ Aboli tras la cifra 3 da l'artitgel 82 da l'Ordinaziun davart la promoziun dal sport dals 23 da matg 2012, en vigur dapi il 1. d'october 2012 (CULF 2012 3967)

⁷ CS 814.501

⁸ Integrà tras la cifra II 1 da l'Ordinaziun dals 24 d'october 2007, en vigur dapi il 1. da schaner 2008 (CULF 2007 5651)

⁴ Il SEFRI garantescha la coordinaziun cun e tranter ils circuls interessads ed ils chantuns. Sch'els n'arrivan betg da sa cunvegner, decida il SEFRI resguardond il niz general per la furmaziun professiunala ed eventuels reglaments cun ils partenaris socials.

3. part: Furmaziun pratica professiunala

Art. 14 Cuminanza da manaschis d'emprendissadi
(art. 16 al. 2 lit. a LFPr)

¹ Ils manaschis ch'èn participads ad ina cuminanza da manaschis d'emprendissadi reglan lur competenzas e lur responsablads en in contract en scrit.

² Els numnan in manaschi principal u in'organisaziun principala che concluda il contract d'emprendissadi e che represchenta la cuminanza vers anora.

³ La permissiun da furmaziun per la cuminanza da manaschis d'emprendissadi vegn dada al manaschi principal u a l'organisaziun principala.

Art. 15 Praticums
(art. 16 al. 1 lit. a ed al. 2 lit. a LFPr)

¹ Ils purschiders d'ina furmaziun fundamentala da scola procuran per ina purschida da plazzas da praticum che correspunda al dumber d'emprendistas e d'emprendists. La scola cumprova quai visavi l'autorità da surveglianza.

² Ils purschiders da la furmaziun fundamentala da scola èn responsabels per la qualità dal praticum visavi las autoritads da surveglianza.

³ Il purschider da la furmaziun fundamentala da scola concluda in contract cun il purschider dal praticum. En quest contract s'oblighescha il purschider dal praticum d'intermediar la furmaziun pratica professiunala en ina moda conforma a las prescripziuns ed eventualmain da pajar in salari a l'emprendista u a l'emprendist.

⁴ Il purschider dal praticum concluda in contract da praticum cun l'emprendista u cun l'emprendist. Quest contract basegna l'approvaziun da l'autorità da surveglianza, sch'il praticum dura pli ditg che sis mais.

Art. 16 Furmaziun pratica professiunala instruida en scola
(art. 16 al. 2 lit. a LFPr)

Avant che dar ina permissiun per la furmaziun ad in'otra instituziun ch'è reconuschida per instruir la pratica professiunala, sclerescha il chantun – en collavuraziun cun las organisaziuns dal mund da lavur cumpetentas – en spezial, sche la relaziun cun il mund da lavur è garantida.

4. part: Furmaziun da scola

Art. 17 Scola professiunala spezialisada
(art. 21 LFPr)

¹ En convegna cun las organisaziuns dal mund da lavur cumpetentas reunescha la scola professiunala spezialisada las furmaziuns fundamentalas ad unitads coerentas. Ella resguarda il connex tematic da las activitads professiunalas e las particularitads da las emprendistas e dals emprendists.

² La scola professiunala spezialisada inditgescha las personas da contact per las emprendistas e per ils emprendists ed, eventualmain, per lur manaschi d'emprendissadi.

³ Sche las prestaziuns da scola mettan en dumonda il success da la furmaziun fundamentala organisada dal manaschi u sch'il cumportament da l'emprendista u da l'emprendist è insufficient, entra la scola professiunala spezialisada en contact cun il manaschi d'emprendissadi. L'emprim taidla ella l'emprendista u l'emprendist.

Art. 18 Furmaziun obligatorica da scola
(art. 21 LFPr)

¹ La furmaziun obligatorica da scola sto vegnir dada almain en dis entirs per las emprendistas e per ils emprendists che absolvan lur furmaziun pratica professiunala en in manaschi. Sch'ella dura pli ditg ch'in di per emna, sto vegnir dada er la part restanta en in unic bloc.

² In di da scola na dastga betg cumpigliar dapli che nov lecziuns, inclusiv ils curs facultativs ed ils curs da sustegn.

³ La scola professiunala spezialisada decida davart las dumondas da dispensaziun da la furmaziun obligatorica da scola. En cas che la dispensaziun ha er consequenzas per la procedura da qualificaziun, decida 'autoritad chantunala.

Art. 19 Furmaziun generala
(art. 15 al. 2 lit. b LFPr)

¹ Il SEFRI relascha prescripziuns minimalas per la furmaziun generala che vegn instruida en il rom da las furmaziuns fundamentalas da dus, trais e quatter onns.

² Las prescripziuns minimalas vegnan concretisadas en in plan d'instrucziun general federal u, en cas da basegns spezial, en las ordinaziuns da furmaziun.

Art. 20 Curs facultativs e curs da sustegn
(art. 22 al. 3 e 4 LFPr)

¹ Ils curs facultativs ed ils curs da sustegn da la scola professiunala spezialisada ston vegnir organisads uschia, ch'igl è pussaivel d'als frequentar senza pregiuditgar me-mia fitg la furmaziun pratica professiunala. Durant il temp da scola na dastga lur dimensiun betg surpassar en media in mez di per emna.

² La necessitad da frequentar ils curs da sustegn vegn examinada periodicamain.

³ Sche las prestaziuns u sch' il cumportament en la scola professiunala spezialisada u en il manaschi d'empredissadi èn insuffizients, escluda la scola – en encliegentscha cun il manaschi d'empredissadi – l'empredista u l'empredist da curs facultativs. En cas ch'ins na vegn betg perina, decida l'autorità chantunala.

⁴ Las scolas professiunalas spezialisadas procuran per ina purschida equilibrada da curs facultativs e da curs da sustegn. En spezial pussibiliteschan ellas curs facultativs da linguas.

5. part: Curs intermanaschials ed auters lieus da furmaziun cumparegliabels

Art. 21

(art. 23 LFPr)

¹ Ils chantuns sustegnan las organisaziuns dal mund da lavur a constituir instituziuns responsablas per curs intermanaschials e per auters lieus da furmaziun cumparegliabels.

² La participaziun dals manaschis als custs che resultan da curs intermanaschials e d'auters lieus da furmaziun cumparegliabels na dastga betg surpassar ils custs cumplains.

³ Il manaschi d'empredissadi porta ils custs che resultan per l'empredista u per l'empredist cun frequentar ils curs intermanaschials ed ils auters lieus da furmaziun cumparegliabels.

6. part: Maturità professiunala federala

Art. 22⁹

(art. 25 LFPr)

La maturità professiunala federala sa drizza tenor l'Ordinaziun dals 24 da zercladur 2009¹⁰ davart la maturità professiunala.

3. chapitel: Furmaziun professiunala superiura

Art. 23

Disposiziuns generalas

(art. 27 LFPr)

¹ Sch'i vegnan purschidas ina maturità professiunala federala ed in examen professiun federal superiur en in sector spezial, sa differenziescha l'examen profes-

⁹ Versiun tenor l'art. 35 al. 2 da l'Ordinaziun dals 24 da zercladur 2009 davart la maturità professiunala, en vigur dapi il 1. d'avust 2009 (CS 412.103.1)

¹⁰ CS 412.103.1

siunal federal superiur da la maturitad professiunala federala tras pretensiuns pli grondas.

² Las qualificaziuns da la furmaziun professiunala superiura vegnan accordadas cun ils standards internaziunals usitads.

Art. 24 Instituziun responsabla

(art. 28 al. 2 LFPr)

¹ Las organisaziuns dal mund da lavur en il senn da l'artitgel 1 alinea 2 pon dumandar l'approvaziun d'in examen professiunal federal u in examen professiunal federal superiur.

² Ellas furman ina instituziun responsabla per metter a disposiziun e per realisar in examen professiunal federal u in examen professiunal federal superiur.

³ Las organisaziuns che pon cumprovar in connex cun l'examen correspondent, ston survegnir la pussaivladad da far part da l'instituziun responsabla.

⁴ L'instituziun responsabla fixescha ils dretgs e las obligaziuns da las organisaziuns participadas, e quai sin fundament da lur dimensiun e da lur capacitad economica.

Art. 25 Premissas per l'approvaziun dals examens professiunals federals e dals examens professiunals federals superiors

(art. 28 al. 3 LFPr)

¹ Entaifer ina branscha appovescha la Confederaziun per ina direcziun specifica mintgamai mo in examen professiunal federal e mo in examen professiunal federal superiur.

² El examinescha:

- a. sche l'examen è d'in interess public;
- b. sch'i na dat nagins conflicts cun la politica da furmaziun u cun in auter interess public;
- c. sche l'instituziun responsabla è en cas da garantir ina purschida naziunala a pli lunga vista;
- d. sch'il cuntegn da l'examen s'orientescha a las qualificaziuns ch'èn necessarias per pratitgar questas activitads professiunalas;
- e. sch'il titel previs è cler, n'è betg confus e po vegnir distingui d'auters titels.

Art. 26 Procedura d'approvaziun

(art. 28 al. 3 LFPr)

¹ L'instituziun responsabla inoltescha al SEFRI la dumonda d'approvar in urden d'examen.

² Il SEFRI coordinescha il cuntegn dals urdens d'examen en las professiuns parentadas.

³ El po disponer la fusiun d'examens che han in sector spezial sumegliant ed ina direcziun sumeglianta.

⁴ Sche la dumonda ademplescha las premissas, communitgescha il SEFRI en il Fegl uffizial federal l'inoltraziun da l'urden d'examen e fixescha in termin da protesta da 30 dis.

⁵ Las protestas ston vegnir inoltradas al SEFRI en scrit e cun ina motivaziun.

Art. 27 Surveglianza
(art. 28 al. 2 e 3 LFPr)

Sch'ina instituziun responsabla n'observa betg l'urden d'examen malgrà ina admoniziun, po il SEFRI surdar l'examen ad in'otra instituziun responsabla u revocar l'approvaziun da l'urden d'examen.

Art. 28 Scolas professiunalas superiuras
(art. 29 al. 3 LFPr)

Las scolas professiunalas superiuras vegnan regladas en in'ordinaziun dal Departament federal d'economia, furmaziun e retschertga (DEFR)¹¹ davart las furmaziuns a las scolas professiunalas superiuras.

4. chapitel: Furmaziun supplementara orientada a la professiun

Art. 29
(art. 32 LFPr)

¹ La Confederaziun sa participescha a mesiras che han la finamira da promover – sin plaun naziunal u entaifer ina regiun linguistica – la coordinaziun, la qualitad e la trasparenza da la purschida da la furmaziun supplementara orientada a la professiun.

² Las structuradas e las purschidas da la furmaziun professiunala che vegnan finanziadas dal maun public stattan a disposiziun, uschenavant che quai è pussaivel, per mesiras dal martgà da lavur tenor la Lescha dals 25 da zercladur 1982¹² davart l'assicuranza cunter la dischoccupaziun.

5. chapitel: Procedura da qualificaziun, attestats e titels

Art. 30 Pretensiuns a las proceduras da qualificaziun
(art. 33 ed art. 34 al. 1 LFPr)

¹ Per las proceduras da qualificaziun valan las suandantas pretendents:

- a. ellas sa drizzan tenor las finamiras da qualificaziun dals relaschs da furmaziun decisivs;

¹¹ Designaziun da l'unitad administrativa tenor l'al. 3 da l'art. 16 da l'Ordinaziun da publicaziun dals 17 da november 2004 (CS 170.512.1), adattada per il 1. da schaner 2013.

¹² CS 837.0

- b. ellas valiteschan ed accentueschan en ina moda equilibrada las parts a bucca, en scrit e praticas tegnend quint da las particularitads dal champ da qualificaziun correspondent e resguardan las notas d'experientscha da la scola e da la pratica;
- c. ellas applitgeschan proceduras adequatas e confurmas a la gruppa en mira per constatar las qualificaziuns che ston vegnir validadas.

² La constataziun d'ina qualificaziun per dar in attestat u in titel vegn fatga sin fundament d'ina procedura d'examen definitiva ed interdisciplinara u d'ina procedura equivalenta.

Art. 31 Autras proceduras da qualificaziun

(art. 33 LFPr)

¹ Autras proceduras da qualificaziun èn proceduras che n'èn per regla betg fixadas en relaschs da furmaziun, ch'èn dentant adattadas per constatar las qualificaziuns necessarias.

² Las proceduras da qualificaziun tenor l'alineia 1 pon vegnir standardisadas per gruppas spezialas da persunas e pon vegnir regladas en ils relaschs da furmaziun decisivs.

Art. 32 Premissas d'admissiun spezialas

(art. 34 al. 2 LFPr)

Sche las qualificaziuns èn vegnidas acquiridas ordaifer ina furmaziun regulara, premetta l'admissiun a la procedura da qualificaziun in'experientscha professiunala d'almain tschintg onns.

Art. 33 Repetiziuns da proceduras da qualificaziun

¹ Igl è pussaivel da repeter maximalmain duas giadas la procedura da qualificaziun. Parts ch'èn reussidas gia pli baud na ston betg pli vegnir repetidas. Ils relaschs da furmaziun pon fixar pretensiuns pli rigurusas concernent l'obligaziun da repetiziun.

² Ils termins per la repetiziun vegnan fixads uschia, ch'i na resultan nagins custs supplementars sproporziunads per ils organs cumpetents.

Art. 34 Valitaziun

(art. 34 al. 1 LFPr)

¹ Las prestaziuns en las proceduras da qualificaziun vegnan exprimidas en notas entiras u en mesas notas. 6 è la meglra nota, 1 è la mendra nota. Notas sut 4 represchentan prestaziuns insufficientas.

² Autras notas che mesas notas èn permessas mo per las medias che resultan da las valitaziuns da singulas posiziuns dals relaschs da furmaziun correspondent. Las medias vegnan arrundadas a maximalmain ina cifra suenter il comma.

³ Ils relaschs da furmaziun pon prevair auters sistems da valitaziun.

Art. 35 Examens finals da la furmaziun fundamentala professionala
(art. 17 LFPr)

¹ Per realisar ils examens finals da la furmaziun fundamentala professionala nominescha l'autorità chantunala expertas ed experts da l'examen. Las organisaziuns cumpetentas dal mund da lavur han il dretg da far propostas.

² Las expertas ed ils experts da l'examen fixeschan en scrit ils resultats da l'examen sco er lur observaziuns durant la procedura da qualificaziun, inclusiv las objecziuns da las candidatas e dals candidats.

³ Sch'ina candidata u in candidat basegna, pervia d'in impediment, meds auxiliars speziels u dapli temp, al vegn quai concedi adequatamain.

⁴ En roms cun ina instrucziun bilingua po l'examen avair lieu totalmain u parzialmain en la segunda lingua.

⁵ Ils organs ch'èn cumpetents per realisar ils examens finals decidan tras ina disposiziun, sch'els concedan in attestat federal da qualificaziun u in attestat federal da furmaziun professionala.

Art. 36 Examens professionals federals
ed examens professionals federals superiors
(art. 43 al. 1 e 2 LFPr)

¹ L'organ ch'è cumpetent per l'examen professional federal u per l'examen professional federal superior decida cun ina disposiziun davart l'admissiun a la procedura da qualificaziun e davart la concessiun dal certificat professional u dal diplom.

² Ils certificats professionals ed ils diploms vegnan emess dal SEFRI. Las absolventas ed ils absolvents pon tscherner, en tge lingua uffiziala che lur certificat vegn emess.

³ Ils certificats professionals ed ils diploms vegnan suttascrits da la presidenta u dal president da l'organ ch'è cumpetent per la procedura da qualificaziun e dal directur dal SEFRI.

Art. 37 Registers
(art. 43 al. 3 LFPr)

¹ Il register dal SEFRI davart ils certificats professionals federals e davart ils diploms cuntegna las suandantas datas:

- a. num e prenum;
- b. data da naschientscha;
- c. lieu da burgais (tar personas ch'èn burgaisas da la Svizra) u naziunalità (tar personas ch'èn burgaisas da l'exteriur);
- d. domicil il mument da l'examen;
- e. onn da l'examen.

² Il SEFRI po publitgar las datas tenor l'alinea 1 literas a, d ed e sco er l'onn da naschientscha da la titulara u dal titular da l'attestat en ina moda adequata.

³ Avant che publictar las datas tenor l'alineia 2 dumonda el il consentiment da la persuna pertutgada. Senza inditgar motivs po quella refusar il consentiment u al revocar posteriuramain.

Art. 38 Titels

(art. 19 al. 2 lit. e, art. 28 al. 2 ed art. 29 al. 3 LFPr)

¹ Il SEFRI maina in register dals titels protegids en las linguas naziunalas. El po numnar supplementarmain titels englais, sche quels èn univocs sin plaun internaziunal.

² Sin dumonda da la titulara u dal titular da l'attestat emetta il SEFRI in document cun ina descripziun englaisa dal cuntegn da la furmaziun u da la qualificaziun professiunala. ...¹³

Art. 39 Participaziun als custs

(art. 41 LFPr)

¹ Ils custs da material e da locaziun na fan betg part da las taxas d'examen tenor l'artitgel 41 LFPr e dastgan vegnir mess a quint totalmain u parzialmain als purschiders da la furmaziun pratica professiunala.

² En cas da proceduras da qualificaziun da persunas che n'absolvan betg ina furmaziun fundamentala professiunala po l'autorità metter a quint totalmain u parzialmain a las candidatas ed als candidats il material necessari ed eventuels custs che resultan supplementarmain.

³ La reglamentaziun da la participaziun als custs per las proceduras da qualificaziun da persunas che n'absolvan betg la furmaziun fundamentala professiunala basegna il consentiment dal SEFRI, sche las proceduras da qualificaziun na vegnan betg realisadas sin plaun chantunal.

⁴ Las entradas or da las indemnisaziuns per ils examens professiunals federals e per ils examens professiunals federals superiors na dastgan betg surpassar ils custs cumplains da l'instituziun responsabla, ils quals vegnan calculads en ina media da sis onns, resguardond la constituziun d'ina reserva adequata.

6. chapitel: Persunas responsablas per la furmaziun professiunala

1. part: Disposiziuns generalas

Art. 40 Persunas responsablas per la furmaziun fundamentala professiunala

(art. 45 al. 3 ed art. 46 al. 2 LFPr)

¹ Tgi che instruescha en la pratica u en scola la furmaziun fundamentala professiunala, sto avair ina furmaziun che correspunda a las pretensiuns minimalas tenor ils artitgels 44 fin 47. Questa furmaziun vegn cumprovada:

¹³ Aboli la frasa tras la cifra 2 da l'aggiunta da l'urden da taxas dal UFFT dals 16 da zercladur 2006, en vigur dapi il 1. d'avust 2006 (CS **412.109.3**)

- a. cun in diplom federal u cun in diplom renconuschi da la Confederaziun; u
- b. per furmaturas e per furmaturs professiunals che han frequentà in curs da 40 uras, cun in certificat da curs.

² Tgi che n'ademplescha betg las pretensiuns minimalas gia al cumenzament da sia activitad, sto acquirir las qualificaziuns correspondentas entaifer tshintg onns.

³ Davart equivalenzas en la qualificaziun da singulas persunas responsablas per la furmaziun professiunala decida l'autorità chantunala suenter avair consultà ils purchiders da furmaziun correspondents.

⁴ Per la furmaziun en tshertas professiuns pon vegnir fatgas pretensiuns che surpaskan las pretensiuns minimalas da questa ordinaziun. Questas pretensiuns èn fixadas en las ordinaziuns da furmaziun decisivas.

Art. 41 Persunas d'instrucziun en la furmaziun professiunala superiura
(art. 29 al. 3 ed art. 46 al. 2 LFPr)

Il departament fixescha las pretensiuns minimalas per persunas d'instrucziun en scolas professiunalas superiuras.

Art. 42 Uras d'emprender

¹ Las uras d'emprender cumpiglian uras da preschientscha, il temp impundi en media per il studi personal, la lavur individuala u en gruppa, ulteriuras occurrenzas en il rom da la furmaziun, las controllas da las enconuschientschas e las proceduras da qualificaziun, l'exercizi e la realisaziun da las enconuschientschas acquiridas en la pratica ed en ils praticums accumpagnads.

² Las uras d'emprender pon vegnir exprimidas en unitads dals systems usitads da puncts da credit; ils rests che resultan vegnan arrundads sin la proxima unitad.

Art. 43 Furmaziun supplementara
(art. 45 LFPr)

La furmaziun supplementara da las persunas responsablas per la furmaziun professiunala è object da las mesiras che servan a sviluppar la qualitat tenor l'artitgel 8 LFPr.

2. part: Pretensiuns minimalas per l'instrucziun pratica e da scola

Art. 44 Furmaturas e furmaturs professiunals en manaschis d'emprendissadi
(art. 45 LFPr)

¹ Furmaturas e furmaturs professiunals en manaschis d'emprendissadi han:

- a. in attestat federal da qualificaziun sin il champ ch'els instrueschan u ina qualificaziun equivalenta;
- b. ina pratica professiunala da dus onns en il champ d'instrucziun;

c. ina qualificaziun pedagogica che correspunda a 100 uras d'emprender.

² En plazza da las uras d'emprender tenor l'alinea 1 litera c pon star 40 uras da curs. Las uras da curs vegnan confermadadas cun in certificat da curs.

Art. 45 Autras furmaturas ed auters furmaturs professiunals

(art. 45 LFPr)

Furmaturas e furmaturs da la professiun en curs intermanaschials ed en auters lieus da furmaziun cumparegliabels sco er en lavuratoris d'emprendissadi ed en autras instituziuns renconuschidas per la furmaziun pratica professiunala ston avair:

- a. in diplom da la furmaziun professiunala superiura u ina qualificaziun equivalenta en il champ d'instrucziun;
- b. ina pratica professiunala da dus onns en il champ d'instrucziun;
- c. ina furmaziun pedagogica da:
 1. 600 uras d'emprender, en cas d'ina activitad professiunala,
 2. 300 uras d'emprender, en cas d'ina activitad professiunala.

Art. 46 Personas d'instrucziun per la furmaziun fundamentala en scola e per la maturitad professiunala

(art. 46 LFPr)

¹ Las personas d'instrucziun per la furmaziun fundamentala en scola e per la maturitad professiunala han ina qualificaziun per instruir al stgalim secundar II cun las suandantas qualificaziuns:

- a. furmaziun pedagogica al stgalim da scola auta;
- b. furmaziun spezialisada cun in diplom al stgalim terziar;
- c. experientscha da sis mais en in manaschi.

² La qualificaziun per instruir ils roms specifics da las professiuns premetta:

- a. in diplom correspondent da la furmaziun professiunala superiura u d'ina scola auta;
- b. ina furmaziun pedagogica da:
 1. 1800 uras d'emprender en cas d'ina activitad a temp cumplain,
 2. 300 uras d'emprender en cas d'ina activitad en uffizi accessoric.

³ Per instruir la furmaziun generala u roms che premettan in studi en ina scola auta èsi necessari:

- a. d'avair ina qualificaziun per instruir a la scola obligatorica, cumplettada cun ina qualificaziun supplementara per la furmaziun generala tenor il plan d'instrucziun correspondent sco er cun ina furmaziun pedagogica da 300 uras d'emprender; u
- b. ina qualificaziun per instruir al gimnasi, cumplettada cun ina furmaziun pedagogica da 300 uras d'emprender; u

- c. in studi correspondent ad ina scola auta, cumpletta cun ina furmaziun pedagogica da 1800 uras d'emprender.¹⁴

Art. 47 Activitad da furmaziun en uffizi accessoric
(art. 45 ed art. 46 LFPr)

¹ In'activitad da furmaziun en uffizi accessoric exequeschan persunas complementarmain a lur activitad professiunala en il champ correspondent.

² L'activitad professiunala principala cumpiglia almain la mesadad dal temp da lavur per emna.

³ Tgi che instruescha en media damain che quatter uras per emna, na suttastat betg a las prescripziuns tenor ils artitgels 45 litera c e 46 alinea 2 litera b cifra 2.

3. part: Furmaziun pedagogica

Art. 48 Cuntegns
(art. 45 ed art. 46 LFPr)

La furmaziun pedagogica da las persunas responsablas per la furmaziun professiunala parta da la situaziun al lieu d'emprendissadi ed al lieu da lavur. Ella cumpiglia ils suandants aspects:

- a. la furmaziun professiunala e ses context: il sistem da la furmaziun professiunala, la basa legala e las purschidas da cussegliaziun;
- b. l'emprendista u l'emprendist: socialisar ils giuvenils e las persunas creschidas en la vita professiunala dal manaschi, da la scola e da la societad;
- c. instruir ed emprender: planisar, realisar ed evaluar las activitads didacticas, sustegnair ed accompagnar las emprendistas ed ils emprendists en lur process concret da furmaziun e d'emprender, evaluar e seleziunar entaifer l'entira paletta dals duns;
- d. realisar quei ch'ins ha emprendì en ils programs da scolaziun dal manaschi e da la scola;
- e. chapir la rolla da la persuna d'instrucziun, mantegnair il contact cun il mund dal manaschi e da la scola, planisar l'atgna furmaziun supplementara;
- f. tractar cun las emprendistas e cun ils emprendists e collavurar cun lur represchentantas e cun lur represchentants legals sco er cun las autoritads, cun ils manaschis d'emprendissadi, cun la scola professiunala e cun auters lieus da furmaziun;
- g. temas generals sco la cultura da lavur, l'etica, dumondas da las schlattainas, la sanadad, la multiculturalitad, la persistenza, la segirezza a la piazza da lavur.

¹⁴ Versiun tenor la cifra 3 da l'artitgel 82 da l'Ordinaziun davart la promoziun dal sport dals 23 da matg 2012, en vigor dapi il 1. d'october 2012 (CULF 2012 3967)

Art. 49 Plans d'instrucziun generals

(art. 45 e 46 LFPr)

¹ Il SEFRI statuescha plans d'instrucziun generals per la qualificaziun da las personas responsablas per la furmaziun professiunala. Quests plans reglan las parts temporaras, la cumposiziun dal cuntegn e la pratica d'approfondaziun tenor las pre-tensiuns respectivas per las personas responsablas per la furmaziun professiunala.

² L'instituziun responsabla organisescha las furmaziuns. Questas furmaziuns cum-bineschan la cumpetenzza professiunala cun la cumpetenzza d'agir sin plaun pedagogic.

4. part: Curs per las expertas e per ils experts da l'examen**Art. 50**

(art. 47 LFPr)

En collavuraziun cun ils chantuns e cun las organisaziuns dal mund da lavur ch'èn responsablas per la procedura da qualificaziun procura il SEFRI per ina purschida da curs per las expertas e per ils experts da l'examen ed envida ellas ed els a quests curs.

5. part:**Renconuschientscha federala da diploms e da certificats da curs****Art. 51**

Cumpetenzas e dumonda

(art. 45 ed art. 46 LFPr)

¹ Davart la reconuschientscha federala dals diploms e dals certificats da curs da furmaziuns per las personas responsablas per la furmaziun fundamentala professiunala decidan:

- a. ils chantuns, sch'i sa tracta da furmaziuns per las furmaturas e per ils furmatur professiunals en manaschis d'emprendissadi, cun excepziun da las furmaziuns sin plaun naziunal;
- b. il SEFRI en cas da tut las autras furmaziuns ed en cas da furmaziuns sin plaun naziunal per las furmaturas e per ils furmatur professiunals en manaschis d'emprendissadi.

² A la dumonda da reconuschientscha ston vegnir agiuntads documents che fan indicaziuns davart:

- a. la purschida da prestaziuns;
- b. la qualificaziun da las personas d'instrucziun;
- c. la finanziaziun;
- d. il svilup da la qualitat.

Art. 52 Premissas per la renconuschientscha da diploms e da certificats da curs
(art. 45 ed art. 46 LFPr)

Ils diploms ed ils certificats da curs vegnan renconuschids, sche:

- a. il program da furmaziun previs correspunda als plans d'instrucziun generals tenor l'artitgel 49;
- b. ina realisaziun irreproschabla è garantida.

6. part: Cumissiun federala per las personas responsablas per la furmaziun professiunala

Art. 53 Cumposiziun ed organisaziun
(art. 45, art. 46 ed art. 48 al. 1 LFPr)

¹ Il Cussegl federal nominescha ina cumissiun federala per las personas responsablas per la furmaziun professiunala.¹⁵

² La cumissiun sa cumpona da nov fin indesch commembras e commembers. Questas personas represchantan la Confederaziun, ils chantuns, las organisaziuns dal mund da lavur e las instituziuns da furmaziun. Ils chantuns han il dretg da proponer trais commembras u commembers. Las regiuns linguisticas e las schlattainas ston vegnir resguardadas adequatamain.

³ La cumissiun s'organisescha sezza.

⁴ Il secretariat vegn manà dal SEFRI.

Art. 54 Incumbensas
(art. 45, art. 46 ed art. 48 al. 1 LFPr)

¹ La cumissiun federala per las personas responsablas per la furmaziun professiunala cusseglia il SEFRI ed al suttamenta propostas en ils suandants secturs:

- a. coordinaziun e renconuschientscha dals diploms per las personas responsablas per la furmaziun professiunala;
- b. nominaziun e surveglianza da las instituziuns che dattan diploms renconuschids da la Confederaziun.

² Davart dumondas da las personas responsablas per la furmaziun professiunala po la cumissiun far recumandaziuns e suttammer ulteriuras propostas.

¹⁵ Versiun tenor la cifra I 6.3 da l'Ordinaziun dals 9 da november 2011 (examinaziun da las cumissiuns extraparlamentaras), en vigur dapi il 1. da schaner 2012 (CULF 2011 5227)

7. chapitel: Cussegliaziun da professiun, da studi e da carriera

Art. 55 Princips (art. 49 LFPr)

¹ La cussegliaziun da professiun, da studi e da carriera metta a disposiziun – ensemen cun partenaris – purschidas per preparar, per tschermer e per concepir la carriera professiunala.

² L'activitad d'infurmaziun ha lieu tras infurmaziuns generalas davart las purschidas da furmaziun sco er tras infurmaziuns e tras cussegliaziuns personalas.

³ En la cussegliaziun persunala vegn elavurada la basa che permetta a las persunas che tschertgan cussegl da prender decisiuns da professiun, da studi e da carriera tenor lur capacitads ed interess sco er resguardond las pretensiuns dal mund da lavur.

Art. 56 Pretensiuns minimalas a furmaziuns per cussegliadras e per cussegliaders (art. 50 LFPr)

¹ Furmaziuns spezialisadas per la cussegliaziun da professiun, da studi e da carriera vegnan purschidas en ina scola auta u en ina instituziun renconuschida dal SEFRI.

² La furmaziun spezialisada cumpiglia:

- a. 600 uras d'emprender per studentas e per students cun in diplom d'ina scola auta respectivamain 1800 uras d'emprender per las ulteriuras studentas e per ils ulteriurs students;
- b. praticums supplementars da totalmain dudesch emnas.

³ Per l'instrucziun è necessari il diplom d'ina scola auta u il diplom d'ina instituziun renconuschida da la Confederaziun en cussegliaziun da professiun, da studi e da carriera sco er la cumprova da la cumpetenza metodica-didactica.

⁴ Il SEFRI decida en il singul cas davart l'equivalenza d'auters diploms.

Art. 57 Cuntegns da la furmaziun (art. 50 LFPr)

¹ La furmaziun spezialisada per la cussegliaziun da professiun, da studi e da carriera cumpiglia ils suandants aspects:

- a. l'uman sco individi: psicologia dal svilup, da l'emprender e da la personalitad;
- b. uman e societad: basa sociologica, giuridica ed economica;
- c. uman e lavur: sistem da furmaziun, tscherna da professiun e da studi, enconuschientschas da la professiun, psicologia da lavur e martgà da lavur;
- d. metodos da lavur: cussegliaziun, diagnostica, preparaziun da la tscherna da professiun, controllas dals resultats, documentaziun e lavur da publicitad;
- e. chapientscha da las incumbensas: etica professiunala, identitad professiunala, svilup da la qualitat.

² Ella tegna quint dals differents accents da la cussegliaziun da giuvenils, da la cussegliaziun da studi, da la cussegliaziun da carriera per persunas creschidas e da la cussegliaziun da persunas cun impediments.

Art. 58 Admissiun a la procedura da qualificaziun ed als diploms
(art. 50 LFPr)

¹ Davart l'admissiun a la procedura da qualificaziun decida l'instituziun da furmaziun. Ella tegna er quint da las qualificaziuns ch'èn vegnidas acquiridas ordaifer sia atgna purschida da furmaziun.

² Tgi che ha reussì la procedura da qualificaziun, survegn in diplom da l'instituziun da furmaziun ed ha il dretg da purtar il titel da «cussegliaadra diplomada da professiun, da studi e da carriera» respectivamain da «cussegliaader diplomà da professiun, da studi e da carriera».

8. chapitel: Participaziun da la Confederaziun als custs da la furmaziun professiunala; fond per la furmaziun professiunala

1. part: Disposiziuns comunablas

Art. 59 Basa da calculaziun per la participaziun als custs da vart da la Confederaziun
(art. 52 al. 1 ed art. 59 al. 2 LFPr)

¹ La participaziun da la Confederaziun als custs da la furmaziun professiunala per ademplier las incumbensas tenor LFPr vegn calculada a maun da la media dals custs nets ch'èn resultads per il maun public ils quatter onns chalendars precedents.

² Ils custs nets vegnan calculads cun agid d'in quint integral dals custs per las expensas, main las entradas.

³ Tar ils custs nets na tutgan betg:

- a. ils custs per las autoritads executivas;
- b. ils custs da las plazzas da lavur ed ils salaris da las emprendistas e dals emprendists da l'administraziun publica e d'interpresas dal dretg public.

Art. 60 Custs dals chantuns
(art. 53 al. 2 LFPr)

¹ Ils chantuns communitgeschan al SEFRI annualmain fin il 1. da fanadur ils custs nets ch'els e las vischnancas han gi l'onn precedent per la furmaziun professiunala.

² Ils custs ston vegnir repartids a maun da las expensas per las incumbensas tenor l'artitgel 53 alinea 2 LFPr. Ils custs da la furmaziun fundamentala da scola ston vegnir cumprovads separadamain.

³ En directivas po il SEFRI prevair in'ulteriura repartiziun.

Art. 61 Repartiziun da la part federala
(art. 52 al. 2 LFPr)

La part federala vegn repartida sco suonda:

- a. prestaziuns da la Confederaziun tenor ils artitgels 4 alinea 2 e 48 LFPr;
- b. contribuziuns tenor ils artitgels 54 e 55 LFPr;
- c. contribuziun tenor l'artitgel 56 LFPr;
- d. contribuziuns pauschalas tenor l'artitgel 53 LFPr.

2. part: Contribuziuns pauschalas

Art. 62
(art. 53 LFPr)

¹ Il credit da la Confederaziun per contribuziuns pauschalas als chantuns tenor l'artitgel 53 LFPr vegn reparti sco suonda:

- a. ina part per ils custs da las furmaziuns fundamentalas da scola;
- b. ina part per ils ulteriurs custs da la furmaziun professiunala.

² La part tenor l'alinea 1 litera a vegn repartida sin ils chantuns a norma dal dumber da persunas che absolvan ina furmaziun fundamentala da scola, la part tenor l'alinea 1 litera b a norma da las ulteriuras persunas che absolvan ina furmaziun fundamentala professiunala. Decisiva è qua la media dals quatter onns precedents.

³ Sch'in chantun n'ademplescha betg incumbensas en il sector da la furmaziun professiunala superiura e da la furmaziun supplementara orientada a la professiun, al vegn pajada ina contribuziun pauschala ch'è analogamain pli pitschna.

⁴ ... 16

⁵ Il SEFRI paja las contribuziuns annualmain en duas transchas.

3. part: Ulteriuras contribuziuns federalas

Art. 63 Contribuziuns per sviluppar la furmaziun professiunala
(art. 4 ed art. 54 LFPr)

¹ Las contribuziuns federalas a favur da projects per sviluppar la furmaziun professiunala tenor l'artitgel 54 LFPr cuvran maximalmain 60 pertschient dals custs. En cas excepziunals motivads pon vegnir concedidas contribuziuns fin ad 80 pertschient dals custs.

² Las contribuziuns vegnan concedidas sco suonda:

¹⁶ Aboli tras la cifra I 1 da l'Ordinaziun dals 7 da november 2007 davart la golvaziun da finanzas e la repartiziun da las incumbensas tranter la Confederaziun ed ils chantuns, en vigur dapi il 1. da schaner 2008 (CULF 2007 5823)

- a. per studis e per projects da pilot: tenor lur capaciad da sclerir en la pratica la realisabladad e l'efficacitad da novs mecanissem da furnaziun u tenor lur capaciad da realisar ina refurma;
- b. per la creaziun da novas structurass solidas: tenor lur capaciad da reunir differents partenaris ad ina instituziun responsabla independenta per novs secturs da la furnaziun professiunala.

³ Ils projects na vegnan betg sustegnids pli ditg che quatter onns. Il sustegn vegn prolungà per maximalmain in onn.

Art. 64 Contribuziuns per prestaziuns spezialas ch'èn d'in interess public
(art. 55 LFPr)

¹ Las contribuziuns federalas a favur da prestaziuns spezialas ch'èn d'in interess public tenor l'artitgel 55 LFPr cuvran maximalmain 60 pertschient dals custs. En cas excepziunals motivads pon vegnir concedidas contribuziuns fin ad 80 pertschient dals custs.

² Las contribuziuns vegnan concedidas sco suonda:

- a. tenor il grad da l'interess;
- b. tenor la pussaivladad che las personas petentas han da furnir in'atgna prestaziun;
- c. tenor l'urgenza da la mesira.

³ Las contribuziuns vegnan concedidas per maximalmain tschintg onns. Ina prolungaziun è pussaivla.

Art. 65¹⁷ Contribuziuns per realisar examens professiunals federals ed examens professiunals federals superiurs
(art. 56 LFPr)

¹ Las contribuziuns federalas tenor l'artitgel 56 LFPr per realisar examens professiunals federals ed examens professiunals federals superiurs cuvran maximalmain 60 pertschient dals custs.

² Per examens ch'èn spezialmain custus per raschuns che han in connex cul rom po vegnir pajada ina contribuziun che cuvra fin ad 80 pertschient dals custs. Dumondas en quest resguard èn dad argumentar spezialmain.

Art. 65a¹⁸ Contribuziuns per furnaziuns da scolas professiunalas superiuras
(art. 56 LFPr)

¹ Las contribuziuns federalas tenor l'artitgel 56 LFPr per furnaziuns da scolas professiunalas superiuras cuvran maximalmain 25 pertschient dals custs.

¹⁷ Versiun tenor la cifra I da l'Ordinaziun dals 14 da november 2012, en vigur dapi il 1. da schaner 2013 (CULF 2012 6473)

¹⁸ Integrà tenor la cifra I da l'Ordinaziun dals 14 da november 2012, en vigur dapi il 1. da schaner 2013 (CULF 2012 6473)

² Contribuziuns per furmaziuns da scolas professiunalas superiuras vegnan mo concedidas, sche:

- a. questas furmaziuns vegnan purschidas en tut il pajais tras organisaziuns dal mund da lavur ch'èn activas sin plaun naziunal;
- b. i na vegnan pajadas naginas contribuziuns chantunalas per questas furmaziuns.

Art. 66 Procedura da concessiun da las contribuziuns
(art. 57 LFPr)

¹ Il SEFRI relascha directivas davart la dumonda, davart la budgetaziun e davart ils rendaquints dals projects tenor ils artitgels 54 fin 56 LFPr.

² El suttagemta las dumondas al giudicament da la cumissiun federala per la furmaziun professiunala. Projects tenor l'artitgel 54 LFPr vegnan suttagemta a la cumissiun, sch'ils custs dal project surpassan la summa 250 000 francs.

³ En la disposiziun davart la concessiun d'ina contribuziun ad in project tenor ils artitgels 54 fin 56 LFPr fixescha il SEFRI en spezial:

- a. l'import da la contribuziun garantida;
- b. las mesiras per controllar, sche las finamiras èn vegnidas cuntanschidas;
- c. la moda da proceder en cas da svilups nunprevis;
- d. l'evaluaziun da las mesiras prendidas.

⁴ Per ils projects tenor l'artitgel 54 LFPr fixescha il SEFRI supplementarmain en la disposiziun:

- a. d'etappar projects che duran probablamain pli ditg che in onn;
- b. mesiras consecutivas e mesiras da realisaziun;
- c. l'infurmaziun davart ils resultats e lur derasaziun.

4. part: Reducziun u refusa da contribuziuns federalas

Art. 67
(art. 58 LFPr)

La reducziun u la refusa da contribuziuns federalas tenor l'artitgel 58 LFPr vegn calculada tenor il grad da la violaziun da las obligaziuns tras la persuna che survegn las contribuziuns. La reducziun importa maximalmain in terz.

5. part: Fond per la furmaziun professiunala

Art. 68 Dumondas pertutgond l'obligaziun¹⁹
(art. 60 LFPr)

¹ Dumondas pertutgant l'obligaziun d'in fond per la furmaziun professiunala vegnan fatgas:

- a. d'organisaziuns dal mund da lavur ch'èn activas sin plaun naziunal per tut ils manaschis da la branscha en l'entir pajais; u
- b. d'organisaziuns dal mund da lavur ch'èn activas sin plaun regional per ils manaschis da la branscha da lur regiun.

² La dumonda vegn inoltrada en scrit al SEFRI e cuntegna en spezial las suandantas indicaziuns:

- a. las mesiras da promoziun;
- b. il gener da l'incassament da las contribuziuns;
- c. la denominaziun da la branscha;
- d. eventualmain la limitaziun regiunala;
- e. la limitaziun da las prestaziuns visavi auters fonds per la furmaziun professiunala.

³ L'organisaziun posseda – en il senn da l'artitgel 60 alinea 4 litera b LFPr – ina atgna instituziun da furmaziun, sch'ella metta sezza a disposiziun ina purschida che s'occupa principalmain da la scolaziun e da la furmaziun supplementara en la branscha u sch'ella è participada ad ina tala purschida.

4-7 ...²⁰

Art. 68a²¹ Incassament da contribuziuns
(Art. 60 LFPr)

¹ L'organisaziun dal mund da lavur metta en quint las contribuziuns a las instituziuns suttamessas.

² Tgi che furnescha gia prestaziuns tenor l'artitgel 60 alinea 6 LFPr, paja la differenza tranter la prestaziun ch'è gia vegnida furnida e l'import che vegn incassà per augmentar il fond per la furmaziun professiunala ch'è vegni declerà sco generalmain liant. La differenza vegn calculada proporziunalmain sin fundament da las contribuziuns per la medema prestaziun.

³ L'organisaziun dal mund da lavur decretescha l'import sche l'instituziun suttamessa pretenda quai u na paja betg.

¹⁹ Agiuntà tras la cifra I da l'Ordinaziun dals 3 da december 2010, en vigur dapi il 1. da schaner 2011 (CULF 2010 6005)

²⁰ Aboli tras la cifra I da l'Ordinaziun dals 3 da december 2010, en vigur dapi il 1. da schaner 2011 (CULF 2010 6005)

²¹ Agiuntà tras la cifra I da l'Ordinaziun dals 3 da december 2010, en vigur dapi il 1. da schaner 2011 (CULF 2010 6005)

⁴ In decret davart il pajament da l'import ha vigur legala tenor l'artitgel 80 da la Lescha federala da scussiu e da concurs dals 11 d'avrigl 1889²² ed ha la medema vigur ch'ina decisiun giuridica executabla.

Art. 68b²³ Controlla dal diever dals daners, da la contabilitad e revisiun
(Art. 60 LFPr)

¹ L'utilisaziun dals daners or dal fond vegn examinada periodicamain.

² Per la contabilitad dal fond per la furmaziun professiunala ch'è vegnì declerà dal Cussegl federal sco liant valan las disposiziuns tenor ils artitgels 957 fin 964 dal dretg d'obligaziuns²⁴.

³ Ils quintes dal fond ch'è vegnì declerà dal Cussegl federal sco liant vegnan revedids annualmain tras posts independents. Ils rapports da revisiun vegnan inoltrads al SEFRI per enconuschientscha.

9. chapitel: Renconuschientscha da diploms esters²⁵

Art. 69²⁶ Entrada
(art. 68 LFPr)

Il SEFRI u terzas personas (tenor l'art. 67 LFPr) cumpareglian sin dumonda in diplom ester cun in diplom svizzer correspondent da la furmaziun professiunala, sche:

- a. il diplom ester sa basa sin prescripziuns giuridicas u administrativas statalas ed è vegnì emess da l'autorità u da l'instituziun cumpetenta en il stadi d'origin; e
- b. la titulara u il titular dal diplom ester cumprova d'avair enconuschientschas d'ina lingua uffiziala da la Confederaziun ch'èn necessarias per exercitar la professiun en Svizra.

²² CS 281.1

²³ Agiuntà tras la cifra I da l'Ordinaziun dals 3 da december 2010, en vigur dapi il 1. da schaner 2011 (CULF 2010 6005). Ils alineas 5–7 da l'artitgel 68 existent èn daventads ils alineas 1–3 da quest artitgel

²⁴ CS 220

²⁵ Versiun tenor la cifra 2 da l'Ordinaziun dals 12 da november 2014 tar la LF davart l'agid a las scolas autas e davart la coordinaziun en il sector da las scolas autas svizras, en vigur dapi il 1. da schaner 2015 (CULF 2014 4137)

²⁶ Versiun tenor la cifra 2 da l'Ordinaziun dals 12 da november 2014 tar la LF davart l'agid a las scolas autas e davart la coordinaziun en il sector da las scolas autas svizras, en vigur dapi il 1. da schaner 2015 (CULF 2014 4137)

Art. 69a²⁷ Professiuns reglamentadas

(art. 68 LFPr)

¹ Il SEFRI u terzas personas renconuschan in diplom ester che vala per exercitar ina professiun reglamentada, sch'el ademplescha – cumpareglià cun il diplom svizzer correspondent da la furmaziun professiunala – las suandantas premissas:

- a. il stgalim da furmaziun è il medem;
- b. la durada da la furmaziun è la medema;
- c. ils cuntegns da la furmaziun èn cumparegliabels;
- d. la furmaziun estra cumpiglia ultra da las qualificaziuns teoreticas er qualificaziuns praticas u igl è avant maun in'experientscha professiunala respectiva.

² Sch'il diplom ester permetta bain d'exercitar la professiun correspondent en il stadi da derivanza, ma sche betg tut las premissas tenor l'alineia 1 n'èn ademplidas, procuran il SEFRI u terzas personas, en cas da basegn en collavuraziun cun expertas ed experts, per mesiras per cumpensar las differenzas ch'existan tranter il diplom ester ed il diplom svizzer correspondent (mesiras cumpensatoricas) cunzunt en furma d'in examen da qualificaziun u d'ina scolaziun d'adattaziun. Sch'ina part impurtanta da la scolaziun svizra stuess vegnir absolvida per cumpensar las differenzas, na vegnan las mesiras cumpensatoricas betg en dumonda.

³ Ils custs per las mesiras cumpensatoricas vegnan mess a quint a las absolventas ed als absolvents.

Art. 69b²⁸ Professiuns betg reglamentadas

(art. 68 LFPr)

¹ Sche las premissas tenor l'artitgel 69a alineia 1 literas a e b èn ademplidas tar in diplom ester d'ina professiun betg reglamentada, attribueschan il SEFRI u terzas personas il diplom al sistem da furmaziun svizzer tras ina conferma dal nivel.

² Sche tut las premissas tenor l'artitgel 69a alineia 1 èn ademplidas, renconuschan il SEFRI u terzas personas il diplom ester.

Art. 69c²⁹ Renconuschientscha da qualificaziuns professiunalas croatas

(art. 68 LFPr)

¹ Qualificaziuns professiunalas croatas da burgaisas e da burgais da pajais da la UE/AECL, che permettan d'exercitar ina professiun reglamentada en Svizra, vegnan

²⁷ Integrà tras la cifra 2 da l'Ordinaziun dals 12 da november 2014 tar la LF davart l'agid a las scolas autas e davart la coordinaziun en il sectur da las scolas autas svizras, en vigur dapi il 1. da schaner 2015 (CULF 2014 4137)

²⁸ Integrà tras la cifra 2 da l'Ordinaziun dals 12 da november 2014 tar la LF davart l'agid a las scolas autas e davart la coordinaziun en il sectur da las scolas autas svizras, en vigur dapi il 1. da schaner 2015 (CULF 2014 4137)

²⁹ Oriundamain: art. 69a. Integrà tras la cifra II da l'Ordinaziun dals 14 da settember 2005 (CULF 2005 4645). Versiun tenor la cifra I da l'Ordinaziun dals 20 da zercladur 2014, en vigur dapi il 1. da fanadur 2014 (CULF 2014 1873)

renconuschidas en applicaziun da la Directiva 2005/36/CE³⁰ en la versiun lianta per la Svizra tenor l'aggiunta III part A cifra 1 da la Cunvegna dals 21 da zercladur 1999³¹ tranter la Confederaziun svizra e la Communitad europeica cun ses stadis commembers davart la libra circulaziun da persunas.

² Per la renconuschientscha da las qualificaziuns professiunalas en il sistem sectorial da tgirunzas e da tgirunzs da la tgira generala valan las disposiziuns correspondentas en l'aggiunta III cifra 1 dal Contract davart la participaziun da la Republica da la Croazia a la UE³² ed en la Directiva 2013/25/UE³³.

Art. 70³⁴

10. chapitel: Disposiziuns finalas

1. part: Execuziun

Art. 71 SEFRI (art. 65 LFPr)

¹ Il SEFRI exequescha questa ordinaziun, nun che la cumpetenzza saja reglada autramain.

² El è il post da contact per la renconuschientscha vicendaivla dals diploms en il rom da l'execuziun dals suandants contracts internaziunals:

- a. cunvegna dals 21 da zercladur 1999³⁵ tranter la Confederaziun svizra d'ina vart e la communitad europeica e ses stadis commembers da l'autra vart davart la libra circulaziun da persunas;

³⁰ Directiva 2005/36/CE dal Parlament europeic e dal Cussegl dals 7 da settember 2005 davart la renconuschientscha da qualificaziuns professiunalas

³¹ CS 0.142.112.681

³² Contract tranter il Reginavel da la Belgia, la Republica da la Bulgaria, la Republica Tschecha, il Reginavel dal Danemarc, la Republica Federala da la Germania, la Republica da l'Estonia, l'Irlanda, la Republica Greca, il Reginavel da la Spagna, la Republica Franzosa, la Republica Taliana, la Republica da la Cipra, la Republica da la Lettonia, la Republica da la Lituania, il Gronducadi da Luxemburg, la Republica da l'Ungaria, la Republica da Malta, il Reginavel dals Pajais Bass, la Republica da l'Austria, la Republica da la Pologna, la Republica dal Portugal, la Rumenia, la Republica da la Slovenia, la Republica Slovaca, la Republica da la Finlanda, il Reginavel da la Svezia, il Reginavel Uni da la Gronda Britannia e l'Irlanda dal Nord (stadis commembers da l'Uniu europeica) e la Republica da la Croazia davart la participaziun da la Republica da la Croazia a l'Uniu europeica, versiun tenor Fegl uffizial L 112 dals 24 d'avrigl 2012, p. 10

³³ Directiva 2013/25/UE dal Cussegl dals 13 da matg 2013 davart l'adattaziun da tschertas directivas en il sector dal dretg da domicil e da la libra prestaziun da servetschs sin fundament da la participaziun da la Republica da la Croazia, versiun tenor Fegl uffizial L 158 dals 10 da zercladur 2013, p. 368

³⁴ Aboli tras la cifra 2 da l'aggiunta da l'Ordinaziun dals 12 da november 2014 tar la LF davart l'agid a las scolas autas e davart la coordinaziun en il sector da las scolas autas svizras, en vigur dapi il 1. da schaner 2015 (CULF 2014 4137)

³⁵ CS 0.142.112.681

- b. convenziun dals 4 da schaner 1960³⁶ per la fundaziun da l'associaziun europeica da commerzi liber (AECL).

Art. 71a³⁷ Taxas dal SEFRI

Las taxas che vegnan incassadas dal SEFRI per disposiziuns prendidas en emprima istanza e per servetschs furnids en il champ d'incumbensa dal SEFRI sa drizzan tenor l'urden da taxas dal UFFT dals 16 da zercladur 2006³⁸.

Art. 72 Dretg d'access ed obligaziun da dar infurmaziuns
(art. 65 al. 4 LFPr)

¹ Ils posts ch'èn incumbensads cun l'execuziun han access ad occurrenzas da la furnaziun professiunala. Els pon dumandar infurmaziuns e prender invista da documents che concernan la furnaziun professiunala.

² Il SEFRI po dumandar infurmaziuns als chantuns e directamain a terzas personas, a las qualas èn surdadas incumbensadas executivas.

Art. 73 Retratga d'attestats e da titels
(art. 63 LFPr)

¹ Il SEFRI retira attestats e titels ch'èn vegnids acquirids en moda illegala. La persecuziun penala resta resalvada.

² La retratga definitiva d'in attestat vegn communitgada als chantuns; in'eventuala inscripziun en il register uffizial vegn annullada.

2. part: Aboliziun e midada dal dretg vertent

Art. 74

¹ L'aboliziun e la midada dal dretg vertent vegnan regladas en l'aggiunta.

² Per l'aboliziun da reglaments da scolaziun ch'èn vegnids relaschads dal departament sa basond sin l'artitgel 12 da la Lescha federala dals 19 d'avrigl 1978³⁹ davart la furnaziun professiunala, è cumpetent il SEFRI.

³⁶ CS **0.632.31**

³⁷ Integrà tras la cifra 2 da l'aggiunta a l'urden da taxas dal UFFT dals 16 da zercladur 2006, en vigur dapi il 1. d'avust 2006 (CS **412.109.3**)

³⁸ CS **412.109.3**

³⁹ [CULF **1979** 1687, **1985** 660 cifra I 21, **1987** 600 art. 17 cifra 3, **1991** 857 aggiunta cifra 4, **1992** 288 aggiunta cifra 17 2521 art. 55 cifra 1, **1996** 2588 art. 25 al. 2 ed aggiunta cifra 1, **1998** 1822 art. 2, **1999** 2374 cifra I 2, **2003** 187 aggiunta cifra II 2. CULF **2003** 4557 aggiunta cifra I 1]

3. part: Disposiziuns transitoricas

Art. 75 Diploms da la furmaziun professiunala tenor il dretg chantunal
(art. 73 al. 2 LFPr)

¹ Ils titels d'absolventas e d'absolvents da furmaziuns professiunalas tenor il dretg chantunal valan sco titels federals il mument da l'entrada en vigur da questa ordinaziun, sch'els eran reglads fin ussa en convegnas interchantunalas.

² L'equivalenza da titels tenor l'alinea 1 cun ils titels tenor las novas regulaziuns federalas sco er las cundiziuns per convertir eventualmain quests titels vegnan fixadas en ils relaschs respectivs davart la furmaziun.

³ Per reconuscher las furmaziuns e las conversiuns da titels en quels secturs ch'eran suttaless fin ussa al dretg interchantunal, applitgescha il SEFRI las disposiziuns decisivas dal dretg interchantunal vertent fin a l'entrada en vigur dals relaschs davart la furmaziun.

⁴ En il sector da las professiuns da la sanadad è cumpetenta la Crusch cotschna svizra (CCS) per reconuscher las furmaziuns e las conversiuns da titels sco er per reconuscher ils diploms ed ils certificats esters fin a l'entrada en vigur dals relaschs federals decisivs davart la furmaziun.

Art. 76 Persunas responsablas per la furmaziun professiunala
ordaifer il champ d'applicaziun dal dretg vegl
(art. 73 LFPr)

¹ Furmaturas e furmaturs da la professiun ordaifer il champ d'applicaziun da la Lescha federala dals 19 d'avrigl 1978⁴⁰ davart la furmaziun professiunala che han instrui durant almain tshintg onns emprendistas ed emprendists, valan sco qualifictgads en il senn dals artitgels 44 e 45.

² La cumissiun federala per las persunas responsablas per la furmaziun professiunala surveglia l'equivalenza da las qualificaziuns da las suandantas persunas responsablas per la furmaziun professiunala:

- a. furmaturas e furmaturs professiunals en curs intermanaschials ed en auters lieus da furmaziun cumparegliabels sco er en lavuratoris d'emprendissadi ed en autras instituziuns renconuschidas per la furmaziun pratica professiunala;
- b. persunas d'instrucziun.

³ Ella elavura ils criteris per l'equivalenza e formulescha, tge qualificaziuns posteriusas ch'en eventualmain necessarias. Il SEFRI decida davart l'equivalenza e davart eventualas qualificaziuns posteriusas.

⁴ Eventualas qualificaziuns posteriusas ston vegnir acquiridas entaifer tshintg onns sunter la decisiun dal SEFRI.

⁴⁰ [CULF 1979 1687, 1985 660 cifra I 21, 1987 600 art. 17 cifra 3, 1991 857 agiunta cifra 4, 1992 288 agiunta cifra 17 2521 art. 55 cifra 1, 1996 2588 art. 25 al. 2 ed agiunta cifra 1, 1998 1822 art. 2, 1999 2374 cifra I 2, 2003 187 agiunta cifra II 2. CULF 2003 4557 agiunta cifra I 1]

Art. 76a⁴¹ Qualificaziun d'instruir sport

Ils diploms survegnids tenor il dretg vegl – il diplom federal I e II per magisters da gimnastica e da sport, il diplom «magister da sport SAP» ed il diplom da bachelor en sport da la Scola auta federala da sport a Magglingen – valan sco qualificaziuns d'instruir tenor l'alinea 3 da l'artitgel 46.

Art. 77 Contribuziuns pauschalas

(art. 73 al. 3 ed al. 4 LFPr)

¹ Las incumbensas dals chantuns tenor l'artitgel 53 alinea 2 LFPr vegnan cofinanzias cumplainamain da la Confederaziun sur las contribuziuns pauschalas tenor la LFPr e tenor questa ordinaziun, e quai a partir dal tschintgavel onn dapi l'entrada en vigur da la LFPr.

² Ils emprims quatter onns suenter l'entrada en vigur da la LFPr vala la suandanta regulaziun:

- a. Las incumbensas tenor l'artitgel 53 alinea 2 LFPr che la Confederaziun ha sustegnì fin ussa sin basa d'ina da las suandantas leschas, sustegna ella vinavant tenor questas leschas:
 1. Lescha federala dals 19 d'avrigl 1978⁴² davart la furmaziun professiunala,
 2. Lescha d'agricultura dals 29 d'avrigl 1998⁴³,
 3. Lescha dal guaud dals 4 d'october 1991⁴⁴,
 4. Lescha federala dals 19 da zercladur 1992⁴⁵ davart ils agids finansials a las scolas professiunalas superiuras da lavur sociala.
- b. Las ulteriuras incumbensas tenor l'artitgel 53 alinea 2 LFPr sustegna la Confederaziun en il rom dals meds ch'èn avant maun tenor l'artitgel 53 alinea 1 LFPr.

Art. 78 Projects da construcziun e locaziuns

(art. 73 al. 3 LFPr)

¹ Las dumondas da subvenziun per projects da construcziun ch'èn vegnidas inoltras al SEFRI fin a l'entrada en vigur da la LFPr e che cuntengan in program dals locals accompagnà d'in plan d'occupaziun dals locals, in project preliminar u in project da construcziun, vegnan giuditgadas tenor il dretg vertent.

² Sch'i vegn inoltrà in program dals locals accompagnà d'in plan d'occupaziun dals locals u in project preliminar, vegnan mo concedidas subvenziuns tenor il dretg

⁴¹ Integrà tras la cifra 3 da l'artitgel 82 da l'Ordinaziun per la promoziun dal sport dals 23 da matg 2012, en vigur dapi il 1. d'october 2012 (CULF 2012 3967)

⁴² [CULF 1979 1687, 1985 660 cifra I 21, 1987 600 art. 17 cifra 3, 1991 857 agiunta cifra 4, 1992 288 agiunta cifra 17 2521 art. 55 cifra 1, 1996 2588 art. 25 al. 2 ed agiunta cifra 1, 1998 1822 art. 2, 1999 2374 cifra I 2, 2003 187 agiunta cifra II 2. CULF 2003 4557 agiunta cifra I 1]

⁴³ CS 910.1

⁴⁴ CS 921.0

⁴⁵ [CULF 1992 1973. CULF 2003 4557 agiunta I 2]

vertent, sch'i vegn preschentà in project da construcziun fin il pli tard quatter onns suenter l'entrada en vigur da la LFPr.

³ Sch'ina subvenziun è vegnida permessa per in project da construcziun, sto il rendaquint final per il project che duai vegnir realisà ,vegnir inoltrà fin il pli tard diesch onns suenter l'entrada en vigur da la LFPr. Sch'il rendaquint final vegn inoltrà suenter quest termin, na vegnan debitadas naginas subvenziuns pli.

⁴ Las dumondas da subvenziun per la locaziun da locals che vegnivan inoltradas fin a l'entrada en vigur da la LFPr accompagnadas d'ina tabella dals locals, d'in contract da locaziun u d'in contract da locaziun preliminar e d'in plan d'occupaziun dals locals, vegnan giuditgadas tenor il dretg vertent. Las subvenziuns vegnan concedidas fin maximalmain quatter onns suenter l'entrada en vigur da la LFPr.

⁵ Il credit da pajament per ils edifizis e per las locaziuns va a quint da la limita d'ex-pensas tenor l'artitgel 59 alinea 1 litera a LFPr.

4. part: Entrada en vigur

Art. 79

Questa ordinaziun entra en vigur il 1. da schaner 2004.

Agiunta
(art. 74)

Aboliziun e midada dal dretg vertent

I

L'Ordinaziun dals 7 da november 1979⁴⁶ davart la furmaziun professiunala (OFPr) vegn abolida.

II

Las ordinaziuns qua sutvart vegnan midadas sco suonda:

...⁴⁷

⁴⁶ [CULF **1979** 1712, **1985** 670 cifra I 1, **1993** 7, **1998** 1822 art. 26, **2001** 979 cifra II]

⁴⁷ Las midadas pon vegnir consultadas en il CULF **2003** 5047

